

100 Jahr Kolping Hochdorf das esch en stolzi Zahl  
Sones speziells Jubiläum geht's ned allemal

Drom sell das gfiiret wärde uf spezielli Art  
Vor zwöi Jahr anere Klausur machid mer de Start

Jung und Alt send zBaldegg zäme cho  
Und händ sich Zit fürs Idee-sammle gno

Mer händ im Chloster topmotiviert  
E Ruum för üs reserviert  
Händ überleid und gstudiert  
Brainstormet und probiert  
Erfunde und korrigiert  
Tüftlet und diskutiert

Es bruucht denn nomol sone Klausur  
Damit mer chömid uf e konkreti Spur

Idee wärdid klarer, nänd Forme a  
Und gliich wird wiiter gschliffe dra

Bes denn klar wird: so sölls usgseh üses Fäscht  
E Begänigstag mit e huufe Gäscht

Mit Farbtupfer kulinarisch und kulturell  
Halt eifach weder mol ganz Kolping-speziiell

E Schnausermärt sölls gäh mit tolle Ständ  
Wo kulinarischi Köstlicheite im Agebot händ

Es sell es Fäscht för de ganz Pastoralruum si  
Drum lade mer Verein und Gruppe zum mitmache i

Es OK wird zämegstellt, wo alls tuet organisiere  
Tued über Standort, Abläuf und Wärbig studiere

De ganz Verein höuft mit vorbereite – Alt und Jung  
Bim Girlande baschtle, oder Täfeli male mit Schwung

Bim Gottesdienst vorbereite oder au bim Guetzli bache  
För Jedi und jede fende mer öppis won är/sie cha mache

Mer bewärbid üs bim Kolping-Nationalverband scho glii  
Dass d’Kolping-GV au a dem Tag z’Hofdere sell sii

Am 18. Juni findt die GV und üse Märt statt mit allem drumherum  
d’GV i de Braui und de Schnausermärt bim Pfarreizentrum

Und dass d’Bsuecherzahle denn au send möglichscht höch  
Wird flissig Wärbig gmacht mit Flyer und coole Whatsapp-Spröch

Mit lüüchtig orange Täfeli i allne Pfarreie bim Dorfigang  
Lönd mer d’Bevölkerig lo rätsle zemli lang

Was bedüütid ächt die Bildli vo Ässe ond Getränk?  
Ja klar, das esch üses Jubiläums-Kolping-Gschänk

So chond d’Lösig vo dem Rätsel denn doch no uf de Tisch  
Wenn Plakat hangid und üsi Schnausermärt-Website online esch

A de Pfingste semmer präsent i jedere Pfarrei  
Ond überreichid de Chele-Bsuecher e chlini Schnauserei

Au die mitmachende Verein brengid sech i im konstruktive Stil  
Das send tolli Lüüt vo Hofdere, Honeri, Chliwange ond Römerswil

Ond so chaner cho, dä grossi Tag – mer send parad

Hoffentlich spielt s'Wätter met, söscht wärs de schad

Doch die Bedänke verflüügid denn zemli glii  
Sind Prognose doch wunderprächtig gsi

Es esch wunderbar sonnig, schön und zemli heiss  
drom fliesst am Frittig bim Ufbou scho mänge Tropfe Schweiss

Am Samschtigmorge esch ufem Platz denn e huufe los  
Überall wird igrechte und vorbereitet – es esch grandios

Im Dorf wärdid Hewiis mit Chriide gmolt vo Jugendliche und Chinde  
So dass möglichscht vöu Lüüt de Wäg a Märt tüend finde

Und scho schländerid die erschte Lüüt vo Stand zo Stand  
Was es do als z'probiere ged esch wörkli allerhand!

Blinis, Pizza und Wraps gfüllt mit feine Sache  
Schlangebrot womer öberem Fүүr tued knusprig bache

Raclette und Risotto esch au im Sommer guet  
Drom mängi ond mänge bi dene Ständ astoh tued

Wy, Bier, Mineral – das hilft gäg de Schweiss  
Nor för de Bierzapfhahn esch es schiinbar z'heiss

Zum Dessert denn es Kafi ond es Stöck Chueche dezue  
Vo de Seetalglace hets zom Glöck au för alli gnue

De Platz füllt sech, d'Lüüt chömid, es esch e wahri Pracht  
Es wird zäme gredt, diskutiert ond glacht  
Au die GV-Kolping-Delegierte wo Pause händ  
Verpflegid sech am Schnausermärt a de Ständ

Sogar Gescht usem Usland – us Rumänie, Litaue ond Prag  
Fiired met üse zäme dä wunderbari Jubiläumstag

s'Rahmeprogramm esch durch und durch glunge  
Es wird jongliert, musiziert und überall gsunge

De Fäschtgottesdienst esch e wiitere Höhepunkt gsi  
Kolpingfahne us de ganze Schwiiz sind mit debi

E berührendi Fiir, vo Jung und Alt würdig gstaltet  
e tolli Predigt wo üse Präses und Pfarrer Roland haltet

Denn gohts Märtriibe wiiter no es paar gmütliche Stonde  
Bes de Märt denn spoht am Obig en Abschluss hed gfonde

Ond weder packid alli a, mer höft enand  
Und bouet ab, potzt und ruumet uf metenand

So semmer scho glii müed aber glücklich i üsi Näschtli g'läge  
Was mer jetzt no bleibt als Kolping-Präsi esch: Danke säge

E huufe tolli Feedbacks vo vielne Lüüt hani dörfe ghöre  
Ond e grossi Solidarität mit üsem Verein dörfe gspöre

Wie toll das Fäscht dank üch worde esch, wird klar  
Dor ei Rückmäldig, wo alles zämefasst, wunderbar

De Roland meint – won ech mit ihm öbers Fäscht ha diskutiert  
Ihr händ üs es wunderbars Pastoralraum-Fäscht organisiert!

Das fendi au, drom nomol üch allne Danke tuusig  
Zämeschaffe mit so tolle Lüüt, das esch Muusig

för üches Mithälfe, Mitdänke, Mitchrampfe, Mitträge

wett ich Euch allne ganz eifach Merci säge

Am Sonntig semmer z' Baldegg nomol zäme cho  
Ond händ üs Ziit förs gmüetliche Brunche gno

Üsi usländische Gäscht send nomol debi  
Au för sie sends idrücklechi Täg do z'Hofdere gsi

Die letscht GV, esch jo nomol e schriftliche gsi  
Mer hoffid, dass esch jetzt ändgültig verbii

Do mer vor emene Johr ned händ chöne zor GV zämecho  
Händ mer üs för d'Ehrige ond d'Ufnahme i dem Rahme Ziit deför gno

So hed üses Jubiläum e würdige Abschluss gfonde  
Es gohd jetzt jo es Wiili bes zom nächschte Ronde

Drom nämmer doch die schöne Erinnerige ond Erläbnis mit ufe Wäg  
Bi üsne kommende Kolping Hofdere Johr, Woche ond Täg

Nänd öppe mol üsi Vereins-Chronik i d'Hand  
Well, es esch jo wörkli allerhand

Was üse Verein erläbt hed i de letschte 100 Johr  
Do chömmer stolz druf si, das esch wohr

Aber dass es wiitergohd ond wenn mer wänd  
Dass au die nächschte Chronik-Autore öppis z'schriibe händ

De bruuchts Engagement, Offenheit ond Bewegig au wiiterhe  
Vo üs allne - denn wärde mer au in Zuekunft e tolli KF gseh

En Verein, wo sech zu rächt «Kolpingfamilie» nennt  
Wöu sie die beide Begriff Kolping und Familie ned trennt

E Verein wo de Kolping-Geischt wiiter id Gsellschaft treid  
Ond stolz esch ofs orange-schwarze Kolping-Chleid

Mit dene Vorsätz gömmer zäme is Vereinsjohr Nr. 102  
Ech freue mech druf, Danke und Treu Kolping – Kolping Treu!